

Tutu é kuvi ũun e táxnũu San Juan

Ña é kãta'xi ntuvi iña ko

¹ I'a ntaa ntí ni ntõ iñá Cristu, ña é dukuãn tuvi dá iñi ntu'u ñuxiví sa. Tèkú ntí iña ñá ne, Iní ntí ña nuu mií ntí di. Īto nteé ntí ña ne, tñn nta'ã ntí ña di. Ña sá'ã ne, ña é kãka'an o e Tú'un Xuva kō, ña e tá'xi ntuvi iña ko.

² Tsi tá'xi Xuva kō é kīnī ntí ña kata'xi ntuvi iña ko. Iní ntí ña ne, kaka'án ntí ni ntõ é nuu é ntaā i iña ña. Kaka'án ntí ni ntõ ve iña ña'a san, ña kata'xi ntuvi iña ko é ña kantí'i. Tsí dukuãn tuví ña ni Xuva kō nte ntúvi dí'na ne, tá'xi Xuva kō é kīnī ntí ña.

³ Kaka'án ntí ni ntõ nee iña é ini ntí, nee iña e téku ntí, vata koo é kuédadii tsi nima nto ní ntí vata tsí ó e kuédadii tsi nimá ntí ni Xuva ko ni I'xã ñá Jesucristu.

⁴ Sá'ã é kãka'u ntí iña ntó vata koo é kuntõo díni kue'en ntó nī ntí.

Ñá te nēé te nĩñú Xuva kō

⁵ Tú'ũn sa'á nañé'e Jesucristú ntí ne, kaka'án ntí ni nto vē. Vá'ã kue'en Xúva kō. Ña tívī nee iña é kīni kaa iña ña.

⁶ Tē ntáka'an o tsí dadii tsi o ni ñã ntá tsi ntáde o é kīni kaa ne, ntáka'an ó dovete; ñá tē nuu é ntaā i e ntáde o é vatā ó ntio Xuva kō.

⁷ Ntá tsi te vīi o é vā'á vatā ó de Xuva kō ne, kuédadii tsi nima ko ni ta'an ko un ntíi ntíi o. Kidáã ne, nĩñi I'xã ñá Jesucristu kanakate kuétsi kō.

⁸ Te kã'an o tsí ña tuvi kuétsi kō ne, ntaéni nta'ví mii o kúñu kō. Ñá ntántikīn ntí'xe o itsi Xuva kō.

⁹ Te kā'an o ni Xuva ko tsi íō ntí'xe kuétsi kō ne, ini o tsi vií ña é vā'á ne, kada ka'nu iní ña ni ko kuétsi kō. Nakate ña nima ko é un nti'í é kīni kaa san.

¹⁰ Te kā'an o tsí ña tuvi kuétsi kō ne, vata tē ntáka'an o tsí vete Xuva kō. Ña ntákuinti'xe ko tū'un é kāka'an ña.

2

Kanada'ān Cristu ko

¹ I'xá mii ko, i'a kaka'án u ni nto sā'a vata koo é ña vií nto é kīni kaa. Ntá tsi te vīi o é kīni kaa ne, íō xoo é nada'an i kō nuu Xuva ko. Jesucristu ñá ne, vá'ā kue'én ña.

² Tsi ntá'vi Jesuu iña kuétsi kō da éti ña niñi ña ntíkā krusi kan. Ná te da mii tsi iña kuétsi mii kō, tsí iña kuétsi e ntáde un nti'í nti'í ña ntoo ñuxiví sa.

³ Kutuni ko tsí ini ntí'xe o Jēsuu te ntáde ntaa o é kāka'an ña é vīi o.

⁴ Xoó ña'a é kāka'an ña tsí ini ñá ña, ntá tsi ña káde ntaa ña é kāka'an ñá ne, da mii kuē'en tsi é kāka'an ñá dovete. Ná ĩni ka'án ña é nuu é ntaā i.

⁵ Ntá tsi xoo ñá'a é káde ntaa ña é kāka'an Xúva kō é vīi ó ne, kakuinima ntí'xe ña Xuva kō. Dukuan o kútuni ko te i'xa é kāduku ntée nti'xe Xuva kō.

⁶ Xoó ña'a é kāka'an ña tsí uun tsi nima ñá ni Xuva kō né, na vií ña é vā'á vatā o dé Jesuu.

Tū'ún xee é kāka'an Xúva kō é vīi o

⁷ Ntō'o, tá'ān ko e dóo ntio ko, ñá te nūu i é xee san é kāka'an nti ni ntō. Kaka'an xtúku ntí ni nto nūu i é ĩni nto nte ntúvi di'na. Tū'ún san e téku nto kídaā ne, sá'a kāka'an xtúku ú ni ntō.

⁸ Ntá tsi i'a kade vá'a ú uun tú'un xee é nuu é ntaā i iña Cristú ne, iña ntō di. Tsí kaita nti'xin é kīni kaa

san tsi é xee nuu i é nuu é ntaā í, vatā ó kaita nti'xin é nēe san dá kākene ngántí san.

⁹ Te iō ntó ntáka'an ntó tsi ntaíka nto mí kāxi'í ne, ntá tsi ntákune'u iní nto ni tā'an nto ne, vata te ntaíka dukuan ntō mi é nēe.

¹⁰ Xoo e ntákuinima í ta'an í ne, vata tē ntoo ña mi é kāxi'i. Ñá ntío ká ña vií ña nuu i é kīni kaa.

¹¹ Ntá tsi xoo e ntákune'u iní i ni tā'an í ne, vata te ntaíka dukuan ñā mi é nēe. Ña ini ña nté koo vií ña, tsi vata tē ña kaxí'i nuu ña mí'i kī'in ña, tsi dóo nee.

¹² Kaka'án u ni nto, i'xa, tsi e dé ka'nu iní Xuva ko kuētsí nto tsí xi'i Jéssu kuénta iña nto.

¹³ Kaka'án u ni nto, ūva, tsí ini nto ña é tuví di'na da iñi ntu'u ñuxiví sa. Kaka'án u ni nto, na kuētsi, tsi e kúvi idé nto nī tó'ō e ña vá'ā san.

Kaka'án u ni nto, i'xa, tsí ini ntó Xuva kō.

¹⁴ Kaka'án u ni nto, ūva, tsí ini nto ña é tuví di'na da itúvi ñuxiví sa. Kaka'án u ni nto, na kuētsi, tsi dóo iō ntíi ntō, tsí ini va'á nto tú'un Xuva kō ne, e kúvi idé nto nī tó'ō e ña vá'ā san.

¹⁵ Ñá ku kuinīma ntó nuu i é kīni ntáa san é iō ñuxiví sa; ntē ña ku dé kuení nto é vií nto é kīni kaa vatā ó de ña'a, ña é ña ntákuinti'xe i san. Xoo é kākuinima í nuu i é kīni ntáa san é iō ñuxiví sa ne, ñá kákuinima ñá Xuva kō.

¹⁶ É un nti'i nūu i é kīni ntáa é iō ñuxiví sa ne, ñá te nta'a Xuva ko vē'xi, tsí i'a tsi kīi mii ñuxiví sa. Nee iña é ntio nima kīni kaa ko, nee iña é kīni kaa é koto ō, nee iña é kāde i é vīi o e dóo ka'nu ña'a o ne, sá'ā é káta'xi ñuxiví sa.

¹⁷ Kué'en kānti'i ñuxiví sa nī é un nti'i nūu i é kīni ntáa. Ntá tsi xoo ñá'a é kāde ntaa ña é ntio Xuva kō ne, kutuví ñá ni Xuva ko ntii dañu ntúvi.

Nee é nuu é ntaā i ne, nee é dovete

18 I'xá miī ko, dokó sa ntí'i ñuxiví sa. Tēkú nto tsí ki'xi uun ña'a, ña kada ne'u iní nī Cristu. É tīín ña xée ñá ve. Dukuān ne, kutuni ko tsí dokó sa ntí'i ñuxiví sa ve.

19 Ña kuān ntáa sán ne, kīi nteé xio ña kō, é dadii íka o ni ñā, tsí ña te kuédadii nima ñá ni kō. Tē dí uun tsi nima ñá ni kō né, kuan tsí o ntaika dadii o ni ñā. Ntá tsi kīi nteé xio ña kō vata koo é tidito tsí ña te iña ko ña é un ntí'i ñā.

20 Ntá tsi Jesuú ne, tā'xi ña Espíritū Sántū é kunūu ña nima ntó vata koo é kūtuni ntó nee iña é nuu é ntaā í iña ña.

21 É kuān ó kaka'u ú ne, ñá te kakā'án u é ña íni nto nee iña é nuu é ntaā í, tsí ini vá'a nto. Da nēé ka dovete ne, é ini nto tsí ña te nuu é ntaā í.

22 ¿Xoó ntu e dóo vete ī? ¿Ñā ntu te ña é kākā'an tsí Jesuú ne, ña te dívi ñā é taxnuu Xuva kō? Ña kuān ntáa sán ne, kade ne'u iní ña nī Cristu, tsí kaka'an ña tsí ña te nuu é ntaā í é dadii Xuva ko ni I'xā ña.

23 Xoó ña'a é kākā'an ñá tsi Jesuú ne, ña te dívi ñā é taxnuu Xuva kō ne, ñá ini ña xoo é Xuva kō di. Ntá tsi xoó ña'a é kākā'an ñá tsi táxnuu nti'xe Xuva ko I'xā ñá Jesuú ne, ini ñá Xuva kō di.

24 Dukuān né, xnūu nto nima nto tú'ūn e téku nto dí'na. Te naka'ān ká nto tú'ūn sa'á ne, kuvi uun tsi nima ntó ni Xuva ko, ni I'xā ña.

25 Jesucristú ne, xé'e ñā xu'u ña tsí ta'xi ña ntuvi vā'á iña ko ntii dañu ntúvi.

26 Kaka'án u ni nto sá'a tsí iō ñá'a é ncho kani nta'ví ña nto.

27 Ntá tsi é nī'i nto Espíritū Sántū sán ne, ñá kantio é nakuā'a tuku ña'a nto. Tsi e tá'xi Jesucristu Espíritū Sántū sán ne, divi ña kanañē'e ñá nto é un ntí'ī. Ñá tē dovete kaká'an ñá ni ntō, tsí nuu é

ntaā i. Kuntoo dadii nto nī Cristu, vātā ó kanañ'e Espíritū san nto.

²⁸ Kaka'án u ni nto ve, i'xá ko, te kuntoo dadii nto nī Cristu vata koo é tē ntií díto ña ne, kunteē ini ko ña, ñá te kūka'an nuú ko ña tē xee ña kídaā.

²⁹ Ini ntó tsi dóo va'á Xuva kō. Dukuān né, da xōó ka ña'a é kāde ña é vā'á ne, ña'ni ñā é i'xá nti'xe Xuva ko ñā.

3

I'xa e ntáduku ntée Xuva kō

¹ Koto nto nté ntu kaa dii kakuinima Xúva ko kō, tsi tá'xi ña é kuvi o i'xā ñá ne, i'xá nti'xe Xuva kō kúvi ō. Ña é ña ntákuinti'xe i Xuva kō ne, ñá ini ñá xoo ñá'a o, tsí nte ñá ini ña xoo é Xuva kō ña.

² Ntō'o tá'ān kó e dóo ntio kó nto, é i'xá Xuva kō kúvi o vevii ne, vata kutūni kó nee iñá ntu ntuvi o ve tē kúvi, ntá tsi ini o tsí te ntií díto Jesuú ne, ntuvi o vata kaa ña ña. Tsí kidáā ne, kini o ña nté kaa ña.

³ Un ntií ntií ña'a, ña ntantétu Jesuú ne, ñá vii ka ña é kīni kaa, tsí Jesuú ne, dōo va'á ña ne, ña túvi kuetsí ña.

⁴ Un ntií ntií ña'a, ña é ncho vii kuetsi sán ne, ña ntáde ntaa ña é kāka'án lei iñá Xuva ko. Iō kuetsí ko tē ña ntáde ntaa o é kāka'án lei san.

⁵ Ini ntó tsi vé'xi Jesuú vata koo é nakuitā ña kuetsi kō. Jesuú ne, ña túvi kuetsí ña nté un siin.

⁶ Xoó ña'a, ña é kanuu iní i ña ne, ña ncho vii ka ña é kuetsí san ña. Xoó ña'a, ña é da mií é kāde kuetsí sán ne, vata kiní ñá Jesuu. Ntē ñá ini ña xoo é Xuva kō ña.

⁷ I'xá mií ko, ñá kū da vá'a nto é káni nta'ví ña'a san nto. Xoó ña'a, ña é kāde é vā'á ne, vá'a nti'xe ña vata kaá mií ñā.

⁸ Ntá tsi xoo ñá'a, ña é kāde kuétsī sán ne, kaduku ntée ña e ña vá'ā san. Tsí nte dí'na ede tó'ō e ña vá'ā san é kīni kaa. Dukuān é vē'xí I'xa Xuva ko ñūxivi sa vata koo é nantī'i ña nuu i é kāde tó'ō e ña vá'ā san.

⁹ Xoó ña'a é nakáku Xuva kō ne, ñá ncho vií ka ña é kīni kaa, tsí nuu Xuva kō nima ña. Ña kúvi vīi ka ña é kīni kaa, tsi é nakáku ña nta'a Xuva kō.

¹⁰ Dukuān ne, kutuni ko neé i'xa é kāduku ntée Xuva kō ne, neé i'xa é kāduku ntée tó'ō e ña vá'ā san. Xoó ña'a é ña káde é vā'á ne, ñá te i'xa é kāduku ntée Xuva kō. Nté ña'a, ña é ña kákuinima í ta'an i ne, ñá te i'xa é kāduku ntée Xuva kō.

Kuinima kó ta'an kō

¹¹ Sá'a tū'un e téku nto nte ntúvi dí'na: é na kuīnima kó ta'an kō.

¹² Ñá vīi o vata o dé Caiin, ña é ede é kīni kaa san, tsí é'ni ña ení ña. ¿Nté kui é'ni ntu ña ení ña? Tsí Caiin san ne, dōó kīni o dé ña ne, ení ña ne, dōo vá'ā o dé ña.

¹³ Ñá ku kunti'i ini nto, tā'an kó, tē ntaínchu'vi ña'a ñuxivi sa nto.

¹⁴ Ini o tsí xo'ō ne, ñá nī'í ka ko doxi'í san tsi e ní'i ko ntuvi vā'á iña kó ve. Kutuni ko sá'ā, tsí ntákuinima kó ta'an kō. Xoó ña'a é ña kákuinima í ta'an i ne, kuan tsī koo kuví ña ni kuétsí ña.

¹⁵ Xoó ña'a, ña é ña ntío kue'en tsí i ta'an í ne, vata kaa ña é kaē'ní ña'a kaa ña nuu Xuva ko. Ini nto tsí xoo ñá'a é kaē'ní ña ña'a ne, ña kúvi nī'i ña ntuvi vá'á iña ña ntii dañu ntúvi.

¹⁶ Kutuni ko nté koo kuinima ko, tsí Cristú ne, xé'e ña ntuvi iña ña é kuví ñá kuenta iña ko. Dukuan xo'ō dí ne, nakué'e ó ntuvi iña ko kuenta iña ta'an ko.

¹⁷ Xoó ña'a e dōo iō iña ñá ne, kakutuni ña tsí iō ta'an kō, ña é kakunaá ntee í ne, te kāde vií ini ña

é kué'é ña ne, ¿mí'i ntū nuu é ntaā i é kākuinima ñá Xuva kō?

¹⁸ I'xá miī ko, ñá te da mii tsī rki xaa ko kunteku é kāka'an o tsí dóo kuinima kó Xuva kō, tsí na kuīnima ntí'xe ko ñá né, na vīi o é vā'á ni ta'an kō di.

Koo ntaá iní kō nuu Xuva ko

¹⁹ Dukuān é kūtuni ko tsí xo'ō ne, ntántikin o é nuu é ntaā i. Dukuān ne, nakunuú ka'nu nima kó nuu Xuva ko.

²⁰ Tē ntáde kuení ko té ña vá'a nima kó ne, Xuva kō ne, ini ña nté o ntí'xe nima ko, tsi dií ka ka'nu ña ne, ini ña é un ntí'ī.

²¹ Ntō'ó ta'an kó e dóo ntio kó, te inī o tsí ña tuvi kuétsi kō ne, ñá kūka'an nuu ko é xē étsin o nūu Xuva ko.

²² Dīvi ña ne, ta'xi ña da nēé ka nuu i é kākan o nta'a ña, tsi ntákuinti'xe ko tū'un é kāka'an ñá ne, ntáde o nee iña e ntío ña.

²³ Sá'a kāka'an ña é vīi o: é kuinti'xe ko I'xā ñá Jesucristú ne, kuinima ko ta'an ko, vatā ó kaka'an ña.

²⁴ Da xōó ka ña'a, ña é ntáde ntaa é kāka'an Xúva kō ne, ntákudadii ña ni Xuva kō. Nuú mé'ñu Xuva ko ñá di. Dukuān iní o tsí nuu mé'ñu Xuva ko kō, tsí e tá'xi ña Espíritū Sántū san é kunūu ña nima ko.

4

Espíritu Xuva ko ni ěspíritū ña é kāde ne'u iní i nī Cristu

¹ Ntō'o tá'ān kó e dóo ntio ko, ñá ku kuinti'xe nto da xōó ka ña'a, ña é kāka'an tsí kantikin ña tū'un Xuva kō. Koto nteé va'ā ntó ña vata koo é kūtuni ntó tē nuu é ntaā i é kantikin ñá Xuva kō. Tsi ña te da díi ñá vete ntaíka ña ñuxiví sa.

² Dukuān é kūtuni nto xoo é nūu Espíritu Xuva kō nima i: xoo é kākā'an i tsí nuu é ntaā í tsi kí'xi Jesucristu ñúxiví sa é nī'i ña kúñū é vata kaa ñatíí san ne, kaduku ntée nti'xe ña Xuva kō.

³ Xoó ña'a é ña kuān ó kaka'an iña Jésuú ne, ñá kadūku ntée ña Xuva kō. Ña kuan ntáa san ne, kaduku ntée ña ña kainchu'ví Cristú san. É tēkú nto tsí ki'xi ña sa'á ne, é tuví ña ñuxiví sa vevii.

⁴ I'xá ko, ntáduku ntée nto Xuva kō ne, é kūvi ide ntó ni ña vete kuān ntáa san. Tsí ñi'xi ñā é nūu ña nima ntó ne, dií ka ka'nu ña é vāta kaa é nūu nima ñá ntáduku ntée ñuxiví sa.

⁵ Ña ntáka'an dóveté san ne, da mii ñuxiví sa vé'xi ña. Nee iña e ntáka'an ñá ne, iña ñúxiví sa di ne, dukuān ntaíni ña ñuxiví sa ña.

⁶ Xo'ō ne, ntáduku ntée o Xúva ko. Xoó ña'a é ini ña Xúva kō ne, kaini ña tú'un kō. Xoó ña'a, ña é ña kaduku ntée Xuva kō ne, ñá kaini ña tú'un kō. Dukuān ne, kutuni ko xoó kaka'an i é nuu é ntaā i, xoo é kākā'an í dovete.

E dóo kuínima Xúva ko kō

⁷ Ntō'o tá'ān ko e dóo ntio kó, na kuínima kó ta'an kō xé un xé un ō. Tsí Xuva kō tá'xi ña nté koo kuinima kó ta'an kō. Xoó ña'a é ini kuiníma ñá ta'an ña ne, i'xa é káduku ntée Xuva ko ñā. Ini nti'xe ñá Xuva kō.

⁸ Xoó ña'a, ña é ña ini kuinima í ta'an í ne, ntē ñá ini ñá Xuva kō di. Tsí Xuva kō ne, dóo kuínima ña.

⁹ Nāñē'e Xúva ko kō tsi dóo kuínima ñá kō e táxnūu ña I'xá mii ña ñuxiví sa vata koo é nī'i ko ntuví va'á iña ko kuenta iña ña.

¹⁰ Dukuān né, kūtuni ko tsi dóo kuínima ñá kō, tsí kuān té ña ni kuiníma ko ña kídaā ne, di'na ña kuínima ñá kō ne, taxnūu ña I'xá ña vata koo e ntá'vi ña kuétsi kō da éti ña niñi ña kuénta iña ko.

11 Ntō'o e dōo ntio kó ne, dōó kue'e kuínima Xúva ko kō ne, kuan koo na kuínima kó ta'an kō di.

12 Xuva kō ne, nté uun ña'a vata kiní ña ña. Ntá tsi te kuínima kó ta'an kō ne, nuu mé'ñu Xuva ko kō. Kidáā ne, kuinima ntí'xe ko vatā ó kuinima Xúva ko kō.

13 Ini o tsí nuu mé'ñu Xuva ko kō ne, uun tsi kúvi o ni ñā, tsí e tá'xi ña Espíritu ñā é kūnuu mé'ñu kunuu dava ña kō.

14 Ntí'í ne, iní nti ne, ntáka'án nti tsi táxnuu Xuva ko I'xā ñá vata koo é nakáku ña ña ntántoo ñuxiví sa.

15 Da xōo ka ña'a é kāka'an ña tsí Jesuú ne, I'xá mii Xuva ko ñā ne, nuu mé'ñu Xuva ko ñā ne, uun tsi kúvi ña ni Xuva kō.

16 Ntí'í ne, é kūtuní nti ne, kakuinti'xe nti tsí Xuva kō né, dōo kuínima ñá kō. Dōó ini kuiníma Xúva kō. Xoó ña'a é ini kuiníma ñá ta'an ñá ne, uun tsi kúvi ña ni Xuva kō ne, nuu mé'ñu Xuva ko ñā.

17 Kuān koo kutú've kō é kuinima kué'en ko ta'an kō vata koo é ña u'ví ko tē xee ntúvi é kā'an Xúva ko xoo é vā'a í ne, xoo é ña vā'a i iña ñá ntántoo ñuxiví sa. Tsi é kutú've kō é kuínima ko ta'an ko ñuxiví sa vata o kuínima Xúva ko kō.

18 Xoó ña'a é ini kuiníma ñá ne, ñá kau'vī ña. Tē nuu é ntaā i é ini o é kākuiinima ntí'xe kō ne, ña túvī nee iña é kau'vi ko. Dōó nto'o ko te kau'vī ko. Xoo é kau'vī í ne, vāta kutūni vā'a i nté koo kuinima i.

19 Ini kuiníma kō, tsí di'na kuínima Xúva ko kō.

20 Te iō ñá ne, kaka'an ña: “Kakuinimá ko Xuva kō”, ka'an ña, ntá tsi ña ntío kue'en ñá ta'an ña ne, koó dā dovete kaka'an ña. Tē ña kākuiinima ñá ta'an ña é kainí ña ne, ¿nté ntu koo kuinima ñá Xuva kō, tsí vata kiní ña ña?

21 Xtūví Xuva ko tū'un sá'a é kāda ntaa o: Xoó ña'a é kākuiinima ñá Xuva kō ne, na kuínima ñá ta'an

ña di.

5

Kuvi víi o ni ñuxiví sa

¹ Un ntíí ntíí ña'a ne, kuvi ña i'xá Xuva ko tē ntákuinti'xe ña tsí Jesuú ne, divi ñā é taxnuu Xuva ko ñā. Xoó ña'a é kákuinima ñá uva i'xá san ne, kakuinima ñá i'xá ña di.

² Dukuān né, tē ntákuinima kó Xuva kō né, tē ntáde ntaa o é káka'an ñá ne, dukuān ne, ini ó tsi ntákuinima kó i'xá mii ña Jēsuu.

³ Ntákuinima ntí'xe ko Xuva ko tē ntáde ntaa o é káka'an ña. Tū'un e xtúvi ña é káda ntaa o ne, ñá te xīdo víi.

⁴ Tsí un ntíí ntíí ña'a, ña e kúvi i'xá Xuva kō ne, kuvi víi ña nī é un ntí'í nuū i é kīni kaa é ió ñuxiví sa. Kuvi vii o, tsi ntaínúu ini ko Xuva kō.

⁵ Xoó ña'a é kákuinti'xe i tsí Jesuú ne, I'xá Xuva ko ñā ne, kuvi víi ña nī é un ntí'í é kīni kaa é ió ñuxiví sa.

Nuu i e ntántada ntaa iña I'xá Xuva kō

⁶ Dā kí'xi Jesucristu ñuxiví sa ne, ntute san ni níñí san xe'é kuenta. Ñá te da mii tsi ntūte san, tsí ntute ni níñí di. Miī Espíritū Sántū san kantada ntaa ña nee iña é nuu é ntaā i iñá Cristú di.

⁷ Ntuní nuu i sá'a e ntántuntaa e dukún kán: Xuva ko nī ña é káka'an o Tú'un ña ni Espíritū Sántū. Ntuni sá'a ne, uun tsi ña'a kuvi.

⁸ Ió ka uni núu i ntántuntaa ñuxiví sa di: Espíritū sán, ni ntūte sán, ni níñí san. Ntuni núu i san ntántudadii.

⁹ Kuñti'xe ko tú'ūn é kántada ntaa ña'a san, ntá tsi tú'ūn é kántada ntaa Xúva kō ne, díí ka kue'e nuu á'vi i. Tsí kantada ntaa ña kuenta iña I'xá ña.

10 Xoo é kākuinti'xe i I'xá Xuva kō ne, nuu tú'ūn é nuu é ntaā í nima ña. Xoo é ña kakuinti'xe i Xuva kō ne, vata te kāka'an ña tsí vete Xuva ko, tsí ña ni kuinti'xe ña é kāka'an Xúva ko iña I'xá ña.

11 Sá'a ne, tú'ūn é ntada ntaa Xúva kō: é tā'xi ña é kuntoo o ni ña ntii dañu ntūví te kuinti'xe ko I'xā ña.

12 Xoo e túvi ni'i i I'xá Xuva kō ne, e ní'i ña ntuvi vā'á iña ña nta'a Xúva kō. Xoo é ña tuvi ni'i i I'xá Xuva kō ne, ña túvi ntuvi vā'á iña i nta'a Xúva kō.

I'a nt'i tú'ūn sa'a

13 Kade vá'a u sá'a iña nto, ña ntákuinti'xe I'xá Xuva kō, vata koo é kīni vá'a nto tsí e tá'xi Xuva kō é ni'i nto ntuvi va'á iña nto ntii dañu ntūvi.

14 Ntaínúu ini ko Xuva kō, tsí ini o tsí katekú ña da ntaíkan o da nēé ka nuu i nta'a ña, vatā o ntío ña.

15 Te ĩni o tsí katekú ña é kāka'an ntâ'ví ō ne, ini o tsí ta'xi ntí'xe ña da nēé ka nuu i é kākan o nta'a ña.

16 Xoó ña'a é ĩni ña tsí kade ta'an ña é kīni kaa, uun kuetsi é ña kaxé'e doxi'í san ne, ka'an ntá'vī ñá kuenta iña ta'an ña. Kidáā ne, kué'e Xuva ko ntūvi iña ta'an ñá, tē ña te kuétsi kā'nu é kāxe'e doxi'í san. Tsí ió uun kuetsi é kāxe'e doxi'í san. Ñá te kāka'an u te ka'an nta'ví nto kuenta iña i sá'a.

17 Vata dá kade o é kini kaa ne, ió kuetsí kō. Ntá tsi ña te un ntí ntī kuétsī san kaxé'e doxi'í san.

18 Ini o tsí xoo ñá'a é nakáku ña nta'a Xuva kō ne, ñá ncho vií ka ña é kīni kaa. Tsí I'xá mii Xuva kō ne, kade ña ña kuenta. Ña túvi nēe nuu i é kīni kaa é kūvi vii ka é ña vá'ā san ni ña.

19 Ini o tsí xo'ō ne, ntáduku ntée o Xuva kō. Ntá tsi ña ntáduku ntée ñuxiví kini kaa sá ne, da mī e ntáde ña é kāka'an tó'ō e ña vá'ā san.

²⁰ Ini o tsi e xée I'xá Xuva kō ne, tā'xi ña é kūtuni ko xoo é Xuva nti'xe kō. É ntuvi uun tsi o ni ñā é Xuva nti'xe kō, ni I'xā ñá Jesucristu. Divi ñā é Xuva nti'xe kō né, kata'xi ña ntuvi vā'á iña ko ntii dañu ntūvi.

²¹ I'xá miī kó, kuenta vií nto é ña kunuu iní nto xoo é ña te Xuva ntí'xe kō. Sá'a tsī é kā'án u ni ntō.

**Tū'ún xuva kō vatā ó ntáka'an ña ñuú
Coatzospan
New Testament in Mixtec, Coatzospan
(MX:miz:Mixtec, Coatzospan)**

copyright © 2003 Wycliffe Bible Translators, Inc.

Language: Mixtec, Coatzospan

Translation by: Wycliffe Bible Translators, Inc.

Copyright Information

© 2003, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Mixtec, Coatzospan

© 2003, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

8f775598-56d9-56fd-966e-15e054d2f275